

Mfariji kama Kristo

Lakini mimi nawaambia iliyo kweli; yawafaa ninyi mimi niondoke, kwa maana mimi nisipoondoka, huyo Msaidizi hatakuja kwenu; bali mimi nikienda zangu, nitampeleka kwenu. Yohana 16:7.

Mfariji ambaye Kristo aliahidi kumtuma baada ya kupaa Kwake kwenda mbinguni, ni Roho katika utimilifu wote wa Uungu, akidhihirisha nguvu ya neema ya Mungu kwa wote wanaompokea na kumwamini Kristo kama Mwokozi wao binafsi.

Pamoja na mfanyakazi aliyejiweka wakfu kwa Mungu, popote pale alipo, Roho Mtakatifu hukaa. Maneno yale yaliyosemwa kwa wanafunzi yanasemwa pia kwetu. Mfariji huyu ni wetu vile vile kama alivyo wao.

Hakuna mfariji kama Kristo, mnyenyekevu na mkweli kiasi kile. Anaguswa na hisia za udhaifu wetu. Roho Yake hunena na moyo. Hali zilizvyo zinaweza kututenganisha na marafiki zetu; bahari pana, iliyochafuka inaweza kututenganisha nao. Ingawa urafiki wao wa kweli bado unaweza kuendelea kuwapo, wanaweza wasiweze kuuonesha. ... Lakini hakuna hali ya mambo, hakuna umbali, unaoweza kututenga na Mfariji wa mbinguni. Popote tulipo, popote tutakapokwenda, daima Yupo pale, Yeye aliyetolewa mahali pa Kristo, kutenda badala Yake. Daima yupo upande wa mkono wetu wa kuume, apate kusema maneno yanayotuliza ya upole; apate kusaidia, kutegemeza, kuimarisha, kuinua na kuchangamsha. Mvuto wa Roho Mtakatifu ni uzima wa Kristo katika roho. Roho huyu hufanya kazi ndani na kupitia kwa kila mmoja anayempokea Kristo. Wale wanaojua ukaaji ndani wa Roho huyu hudhihirisha matunda yake—upendo, furaha, amani, uvumilivu, upole, wema na imani.

Roho Mtakatifu daima hukaa na yeye anayetafuta ukamilifu wa tabia ya Kikristo. Roho Mtakatifu hutoa nia safi, kanuni hai, tendaji, ambayo huzitegemeza nafsi zile, zinazofanya bidii, zinazoshindana na majaribu, zinazoamini, katika kila dharura na chini ya kila jaribu. Roho Mtakatifu humtegemeza muumini katikati ya chuki ya ulimwengu, katikati ya uadui wa ndugu, katikati ya kukata tamaa, katikati ya kutokufanikiwa, katikati ya utambuzi wa kutokukamilika na katikati ya makosa ya maisha. Kulingana na usafi na ukamilifu usio na kifani wa Kristo, ushindi ni hakika kwa yule anayemtazama Yeye aliye Mwenye kuanzisha na Mwenye kutimiza imani yetu.... Amezichukua dhambi zetu, ili kwamba kupitia Kwake tupate kuwa na ubora wa kimaadili na kufikia ukamilifu wa tabia ya Kikristo.